



Շ Ի Ր Ա Կ Յ Ա Ն Խ Ր Ո Ն Ի Կ Ա

Հունիս ամսի 25-ին, շաբաթ օրը, Լենինական ժամանեց Գերագույն Հոգևոր Խորհրդի նախագահող գերաշնորհ Տ. Վահան սրբազան արքեպիսկոպոս Կոստանյանը: Սրբազանին ուղեկցում էին բարձրապատիվ Տ. Կոմիտաս վարդապետը և հոգեշնորհ Տ. Մուշեղ արեղան: Բարձրաստիճան հյուրին դիմավորելու համար բազմահարյուր հավատացյալներ հավաքվել էին Ս. Աստվածածին եկեղեցու շրջափակում, Սրբազանը եկեղեցական թափոթով և «Հրաշափառ» շարականով առաջնորդվեց եկեղեցի, որը զարդարված էր տոնականորեն:

Հավատացյալները հոգեկան հրճվանքով ընդունեցին սրբազան հոր բերած՝ Գերագույն Հոգևոր Խորհրդի և միաբանության ողջուններն ու օրհնությունները:

Հավարտ երեկոյան հանդիսավոր ժամերգության, Նորին Սրբազնությունը կատարեց բարեկրոն դպիր Արամ Բոյաջյանի սարկավագ ձեռնադրության կոչման հանդիսավոր և խորհրդավոր արարողությունը: Խարտավիլակի պաշտոնը կատարում էր Տ. Կոմիտաս վարդապետը: Կոչման արարողությունը շարունակվեց մինչև ուշ երեկո:

Հաջորդ օր, 26 հունիս կիրակի, Տ. Մուշեղ արեղան մատուցեց սուրբ պատարագ: Եկեղեցին և վերնատունը լցվել էր հավատացյալների աննախընթաց բազմությամբ: Սրբազանը կատարեց սարկավագական և քահանայական շնորհաբաշխություն, նորընծային անվանակոչելով իր ավագանի անունով Տ. Արամ: Օծումից հետո սրբազանը խոսեց մի հոգեշնորհ քարոզ և ծանրացավ մասնավոր կերպով Մայր Աթոռ Ս. Էջմիածնի հայ ժոժողովրդի կյանքում կատարած նախախնամական պատմական դերի մասին՝ ազդային

գոյության պահպանման և հայ մշակույթի պարզացման և պահպանման գործում: Ապա խոսեց առանվեց դարերի պատկառելի հնություն մի վերածացած Ս. Էջմիածնի Մայր Տաճարի վերանորոգության մասին՝ հայկական հարազատ կառավարության ծախսով: Իր քարոզի վերջում սրբազանը գոհունակություն հայտնեց Շիրակի թեմի առաջնորդական փոխանորդ գերապատիվ Տ. Գևորգ ծայրագույն վարդապետ Վաթյանի շինարարական-վարչական գործունեության մասին: Մեծ խանդավառություն առաջացրեց սրբազան հոր այն հայտարարությունը, թե մոտ օրից սգի շղարշը կվերանա Մայր Աթոռից արժանավոր Գահակալի ընտրությամբ սեպտեմբեր ամսում:

Նույն օրը Վահան սրբազանը, հայր սուրբի ընկերակցությամբ, այցելեց Արթիկի շրջանի Վահրամա վանքը, իսկ հաջորդ առավոտուն վերադարձավ Ս. Էջմիածին:

Հուլիսի 3-ին, կիրակի օր, առաջնորդական փոխանորդ հայր սուրբը, նորընծա Տ. Արամ քահանայի և զարաց դասի հետ գնաց Կիրովական և թափոթով առաջնորդվեց եկեղեցի, ուր և մատուցեց սուրբ պատարագ և բանին կենաց քարոզությամբ մխիթարեց հավատացյալներին:

Առաջնորդական փոխանորդ հայր սուրբը իր հովիվական հաճախակի այցելություններով մխիթարում է Շիրակի թեմին ենթակա բոլոր հայ հավատացյալներին: Իր այցելությունների ընթացքում հայր սուրբը զբաղվում է եկեղեցիների, հոգաբարձությունների, վանքերի վարչական-տնտեսական հարցերով և անում է ինչ անհրաժեշտ է թեմի եկեղեցիների պայծառացման համար:

Հ. ՊԱՆՅԱՆ

